



Sustegn finanziel per las funtaunas d'aua

La radunanza da vischins a Scuol ha deliberà in credit per projects en connex cun las funtaunas.

7



Vermicelles, pralinas, biera e mel

Il marun è ina nuscha multifara nà dal sid, ma crescha ella en futur er en Surmeir?

9

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Mariano Tschuor sco referent al Dies academicus alla SAT

■ (mc) La cuida da tener l'alocuziun festiva a l'occaziun dall'entschatta digl onn da studi 2019/20 alla Scola auta da teologia ha igl anteriur schurnalist e directur dad RTR *Mariano Tschuor* giu. Sco president dalla cumissiun da medias dalla Conferenza dils uestgs svizzers ha Tschuor (Laax/Mariastein) tematisau la relaziun denter baselgia e comunicaziun e constatau che quella semova el dilemma denter annunziatiun e perplexitad. Partend dall'atgna socialisaziun ecclesiastica sco ministrant a Rueun e gimnasiast alla scola clautrala da Mustér, denton cunzun era sin fundament da sias experienzias sco schurnalist ha el tematisau las

sfidas da comunicaziun dalla baselgia en in mund secularisau e globalisau. Deplorablamein hagi la baselgia piars in bionton da sia relevanza publica e savens s'interessschien las medias e la publicitad mo pli per ils scandals enteifer la baselgia. Per restar verdeivla e credibla stoppi la baselgia representar ina tenuta pli coherent, duvrar in lungatg ed ina simbolica pli capeivels, risguardar la varietad culturala e spirituala, luvrar pli professunal ed a moda concentrada. Il project «Renovaziun dalla baselgia» instradaus dils uestgs svizzers seigi in pass empermettend ella dretga direcziun.

> PAGINA 2

In'istituiziun a Suraua

■ (anr/abc) Sonda han varga 100 personas priu la caschun da far ina viseta ad ina nov'istituiziun lumneziana. Suenter ina evaluaziun da pliras pusseivladads ha la vischnaunca Lumnezia mess a disposiziun en casa da scola ad Uors in spazi da rodund 100 m² pigl Archiv cultural Lumnezia. Il menaschi funcziuna gia dapi igl unviern vargau, *Simon Derungs* e *Gian Carlo Albin* s'engaschan per in'istituiziun ch'ei nizeivla e necessaria pli che mai.

Conservar scazis dil vargau ei finamira digl archiv. Igl ei ina sparta dalla Fundaziun da cultura Lumnezia. Il president da quella, *Martin Cabalzar*, ha engraziu al president communal *Duri Blumenthal* per la beinvulentscha dallas autoritads. *Tarcisi Hendry* da Sedrun, inspectur cantunal e responsabel pils archivs communnals en Surselva, ha purtau ils salids uffizials dil cantun.

> PAGINA 5



Era gliued da Laax e da Falera ha giu interess digl archiv niev ad Uors. Quel dalla Foppa ei a Rueun. FOTO A. BEELI

Bler meil in territori ladin

■ (anr/fa) La racolta da meil in Svizra batta tenor l'organisasiun apisuisse tuot ils records. In media han racolt ils apiculturs svizzers be 13 kils per pövel, «uschè pac sco amo mai». Il motiv es statta tenor l'Uniuin dals apiculturs svizzers la prümavaira cun temperaturas fich fraidas. La situaziun nun es però dapertuot istessa. Il plu bier meil haja dat i'l Tessin. Ma eir ils apicul-

turs in Engiadina e Val Müstair sun cuntaints culla racolta. Sco chi disch *Jachen Puorger* chi preside-scha la società d'apiculturs engiadinaisa haja dat in Engiadin'Ota da-fatta üna racolta fich buna. Eir in Val Müstair sun stats ils aviöls diligaints ed han procurà per üna bunischma racolta.

> PAGINA 7

Quater projects vegnan concretisai

La Val Medel duei daventar pli attractiva – denter auter cun megliera comunicaziun

DA HANS HUONDER / ANR

■ Il process «Giuventetgna muenta la Val Medel» pren contours. Il proxim temps duein pliras ideas ch'ei in il mument aunc sin pupi vegnir concretisadas.

Ina pertucca las vias da velo, l'atra ina nova via cun pumera ed in'ulteriura in festival che duei haver liug l'auter onn. In ulteriur project duei la finfinala far quels treis, mo era l'ulteriura purschida dalla Val Medel, pli econuschents. La partenza per quei project parzial numnaus «Val Medel Goes Social» ei succedida ed entochen Nadal duein emprems cuntengs esser publics. Vid igl entir process ha en special la giuventetgna dalla Val Medel collaborau. Ulteriuras personas ein allura sedecididas da separticipar allas gruppas da lavur che sorprendan uss il tgamun dils projects. Quels ein vegni elavurati comunablamain cun student(a)s dalla Scol'aula per scienzias applicadas Turitg a Wädenswil. Il gliendisdis ei quei process da cooperaziun vegnius terminaus suenter ina lavur da rodund in onn e miez. Sco



Studentas e students dalla Scol'aula per scienzias applicadas Turitg a Wädenswil han presentau ils quater projects che duein ussa vegnir realisai sut il tgamun da gruppas da lavur cun personas indigenas. FOTO H. HUONDER

quei che la responsabla per la gruppa da studentas e students, *Yonne Pirchl*, di ei la lavur stada fetg engrazievla ed ha possibil-

tau als students da bandunar sporadicamein il baun da scola e da seprofundar ella realitad, en quei cass en quella dalla Val Medel. Ils

projects ein surveisevls e bein realisabels, era finanzielmeins.

> PAGINA 3

Heimgartner va tar Ringier

(anr/abc) La directura dad RTR, *Ladina Heimgartner*, banduna l'interpresa. Cun l'entschatta da l'onn 2020 vegn ella a surprendre ina nov'incumbensa sco manadra dal «Corporate Center» da Ringier. Quel è preschent en 19 pajais, per Heimgartner èsi ina nova sfida internaziunala. La directura partenta ha cumenzà sia carriera avant 13 onns sco redactura dad RR. En la vegliadetgna da 30 onns ha ella surprindet in post en la direcziun generala da la SRG SSR a Berna. Returnada a Cuirra è ella 2014 sco directura dad RTR. En connex cun la votaziun da «No Billag» l'onn 2018 è Heimgartner daventada enconuschenta en l'entira Svizra. Gia alura avevan ins speculà ch'ella fetschia in pass en sia carriera professunal. Il president da la società partadra SRG.R, *Vincent Augustin*, deplorescha fitg la sperdita da la directura dad RTR. Heimgartner è actualmain era substituta dal directur general da la SRG SSR *Gilles Marchand*.

> PAGINA 12

Andi Triet, igl amitg sabi

Novas dalla figura da cult da Laax


DAD AUGUSTIN BEELI / ANR

■ Avon 13 onns han las Pencilularas Arena Alva da Laax instradaus ina cooperaziun cul cantatur *Linard Bardill*. Quel ha schaffiu per la scola da skis ina figura d'identificaziun. El ei la figura autentica ch'els pigns san tuccher e dar il maun. Cantar e discuorer cun Ami Sabi fascinescha

ils pigns. Oz sto mintga instrui-der dalla Scola da skis Flem-Laax-Falera enconuscher las figuras ed era esser habels da cantar las canzuns principalas. Avon zacons onns ha l'Arena Alva viu il potenzial dalla figura creada da *Linard Bardill*. Era la stad vargada han plunas affons accumpignau igl um sabi prehistoric sin excursiuns aventurusas. El viandescha e va a

pei, e buc in soli affon tagna e tuleina. Aunc avon Nadal vegn l'interpresa a presentar in'aplicaziun electronica pigl i-phone. Ami Sabi sez, vul gir *Andi Triet*, finescha la stagiun d'unviern 2019/20 sia activitad sco «Ami Sabi». Igl Ami Sabi niev habitescha a Razén.

> PAGINA 3



Ami Sabi alias Andi Triet vegn a far il proxim unviern sia davosa stagiun per l'Arena Alva SA sco «amitg sabi» dils affons. FOTO A. BEELI



30044

Servetsch d'abunents e da distribuziun: tel. 0844 226 226 mail: abo@somedia.ch

9 771424 749004

Baselgia e communicaziun – ina gronda sfida

Avertura digl onn da studi 2019/20 alla Scola aulta da teologia a Cuera

DA MARTIN CABALZAR

■ **Cul Dies academicus ha la Scola aulta da teologia a Cuera aviert stias sera igl onn da studi 2019/20. L'allocuziun festiva ha il schurnalist ed anteriur directur dad RTR Mariano Tschuor tenu. El ei s'occupaus da rudien dalla tematica baselgia e communicaziun, era sin fundament d'atgnas experienzas.** L'aula dalla Scola aulta da teologia ei stada occupada uonn sil davos plaz cura ch'il rector *Christian Cebulj* ha aviert la festività dil Dies academicus. Professoressa *Birgit Jeggle-Merz* ha surdau distincziuns per treis excellentas lavurs da matura. En absenza d'uestg *Peter Bircher*, che funcziuna sco cancellier suprem dalla SAT, ha siu delegau apostolic *Martin Grichting* purtau ils salids digl uestgiu. La festività ed vegnida embellida mucialmein dad *Aduena Bega* (violina) e *Fabio Theus* (orgla).

Baselgia ei communicaziun

Entras siu engaschament sco anteriur schefredactor e directur dad RTR e commember dil directori SRG SSR, president dalla cumissiun da medias dalla Conferenza dils uestgs svizzers ed actual meinaproject per mantener e sviluppar vinavon la claustra da peleginadi da Mariastein dispona *Mariano Tschuor* da vatas experienzas sil sector dalla communicaziun e baselgia. En siu referat bein documentau intitulaus «Baselgia e communicaziun – denter annunziaziun e perplexità» eis el partiu dalla experienzas fatgas tras l'atgna socialisaziun religiusa sco ministrant a Rueun e sco gimnasiast alla scola claustrala a Mustér, per allura cuntinuar cun sias experienzas sco schurnalist e concluder cun entgens muosavias per ina buna communicaziun enteifer la baselgia svizra. Gest all'entschatta ha il referent accentuau che la baselgia sappi buc agir senza communicaziun, senza communicaziun detti ei era negina bibla. Tenor siu avis stat la baselgia en survetsch dall'annunziaziun, dall'intermediaziun, dil scomi e dil dalog. Damai ch'ei seigi denton adina il receptur che fetschi il messadi sappi ei capitar ch'ei detti malcapientschas, aschia che la communicaziun enteifer la baselgia seigi adina ina gronda sfida. Ed ei detti strusch in auter liug che Cuera per dilucidar meglier las schanzas e las sfidas dalla communicaziun ecclesiastica. Memia savens hagien numnadamein uestgs e lur suflats sbattiu e serrau l'escha pil dialog ed impediun ina communicaziun aviarta.

Communicaziun drova confidanza

Dignitaris ecclesiastics ed auters reageschien magari cun irritaziun sch'ils gronds temas relevants da nies temps, il celibat, la moral sexuala, las dunnas ella baselgia vegnan buca tractai tenor lur imaginaziuns. Dils abus gnanc da discurer. Biars dignitaris sortien aunc adina d'ina «communicaziun verticala» e creigien da saver reglar las caussas ed eliminar aschia ils fatgs. «Quei ei u naiv – ni arrogant», manegia Tschuor. Abus en tut lur fuormas seigien in scandal ed in delict criminal, ni sco cardinal Kasper seigi s'exprimius «in puccau mortal inacceptabel». Ei hagi facticamein duvrau bia squetsch public per procurar per silmeins in tec trasparenza en in dils pli stgirs capetels dalla historia dalla baselgia catolica. Entras cuschentiar, zuppentar e brantinar tals delicts hagi la baselgia pias sia confidanza e sia credibilità. Quei tonpli che la baselgia vegli sefar valer sco exempel per creanza e sco instanza moral.

Varietad ni confusiu?

Actualmein constateschien ins ch'adina dapli persunas s'alieneschien e sappien buca s'identificar pli culla baselgia. «Secularisaziun, pluralissem ed individualisaziun ein ils simptoms caracteristics d'ina



Il referent Mariano Tschuor ha cattau l'attenziun d'in grond publicum a l'ocasiun dil Dies academicus alla Scola aulta da teologia a Cuera.

FOTO PH. BAER

profunda transformaziun e midada», constatscha Tschuor. Sco strusch enzacu avon regi oz ina fragmentaziun dalla baselgia en numerusas baselgias parallelas e particularas che flureschien cunzun el spectrum extrem dretg dils tradiziunals. Era ella diocesa da Cuera detti ei talas tendenzas ed ins astgi sedumandar sch'igl uestgiu da Cuera seigi buca staus davant igl episcopat d'uestg Huonder «ina baselgia schismatica». Quei tradeschi en scadin cass in communicau communabel dil general dalla fraternità dils Pius Don *Davide Paglarini* e monsignur *Vitus Huonder* che motiveschian la retratga egl Insiut da buobs a Wangs culs plaid: «Intent e finamira da quei pass ei sulettamein quel da sededicar exclusivamein all'oraziun e meditaziun, da celebrar unicamein la messa tradiziunala e da praticar la tradiziun sco sulet mied dalla renovaziun».

Mo memia savens detti ei declaronzas contradictorias dils magistrats ecclesiastics davant damondas e temas centrals dalla baselgia, di Tschuor. Sco exempel alleghescha el la recenta Sinoda ad Amazonas. Strusch ch'ils emprens sbozs dalla Sinoda seigien stai sin meisa seigien cardinals, uestgs ed uestgs auxiliars semussai inquietai, avertend ch'ina soluziun pastorala per la regiun dalla Amazonas pudessi cuntener divergenzas enviers il doctinat ecclesiastic e savensien aschia haver grevas e nauschas consequenzas per la baselgia universal. Malgrad talas resalvas constatescha Tschuor tonaton ch' il document final dalla Sinoda ha la finala cattau en tut ils puncts ina clara maiorità dils sinodals. En siu priedi final hagi papa *Francestg* stagiau fetg clar la via che la baselgia stoppi encaminar el proxim avegnir. La communicaziun davart questa Sinoda cun ils survetschs dad online, videos, circularas da pressa ed accessibilità als documents seigien in exempel gartegiau da lavur da medias enteifer la baselgia, puntuescha Tschuor. Teoretichers da conspiraziun prognosticheschien denton vinavon la perdisiun dalla mumma-baselgia, da lur baselgia. En scadin cass hagi ei aunc mai dau ina tala varietad d'opiniuns e declaronzas che sveglien cunzun desorientaziun ed imbarass. Quei che maunchi seigi ina certa structuraziun ed in agid per saver far sez in meini a basa d'informaziuns verdeivlas e ponderaziuns madiras.

Grondas sfidas en temps pretensius

Gest en vesta allas sfidas carschentas hagi gest ina Scola aulta da teologia l'impurtanta funcziun da giudicar cun «egliada gigina e disciplina professiunala, denton era a moda populara ed empatica» ils fatgs. Sia incumbenza seigi da sparter il salin dalla senav, demasclar ortgadads ideologicas e valetar il raschuneivel e plausibel, senza stuer quintar cun la retratga dalla Missio canonica. L'incumbenza dils schurnalists seigi da far puncts che gidien a capir il mund dalla baselgia, che seigi per biars intransparentes, gie jasters. Era las medias sezzas fetschian atras actualmein buca mo ina midada da struttura, anzi, era en ina midada da cultura. Quella midada ensiari tut las spartas: produzioni e distribuziun, tecnologia e digitalisaziun, cumportament dils utilisaders, cuntengs ed accessibilità als fontaunas, grond tempo, dinamica disruptiva e novs models da pagament. Pli navon hagi la derasaziun dalla medias socialas influenzas fatalas sin il schurnalisse dil gi.

Socialisaziun catolica en Surselva

Mariano Tschuor ha era tradiu agl auditori co el ei vegnius socialisau religiusamein da siu temps a Rueun ed el gimnasi claustral a Mustér. Il catechissem formavi la directiva empalonta per la veta religiusa e moral, impurtont eri d'esser «pietuos ed haver il cor el dretg liug». Il «catholicissem da milieu» eri caracterisau da tema da Diu, da castigs e da control sociala. Il plevon eri omnipresents ed in'autorità, en baselgia, en scola, en pleiv e vischnauna. Damai ch'il plevon da lezzas uras a Rueun eri in um savievel hagi el buca pitiu d'in trauma, ha Tschuor manegiau. Anzi. La veta el e cun igl onn ecclesiastic cun sia enorma rihezia da colurs e variaziuns, ses rituals e sias fiastas hagien dominau la dramaturgia da sia afonza. Tut eri clar ed incontestabel, schizun la cardientscha. Quei che vegnevi cumandau vegnevi era fatg e procuravi aschia per uorden e relaziuns claras.

Tgi che curdava ord la retscha vegneva marginalisau e stueva vegnir sez a lepa cun sia izolaziun sociala.

Sper il priedi dalla dumengia procuravi era la pressa, la «Gasetta Romontscha», il «Pelegrin» ed il «Bündner Tagblatt», tuts products d'observanza catolica e conservativa, per orientaziun e directiva. Decennis alla lunga hagien clericals en-

gaschai sco pader Maurus Carnot (1865–1935), il posteriur uestg Christianus Caminada (1876–1962), Carli Fry 1897–1956) e Benedikt Simeon (1897–1977) dau en il tun ella pressa catolica da nies cantun. Sebasond sils decret papals davart igl apostolat da pressa ei vegniu cum-battiu il spért dil temps e la moderna, inclusiv la libertad da pressa e religiun ed encunter l'introduziun dalla AVS. Paura tgi che haveva abbonau gasettas buca catolicas, sco la «Bündner Zeitung» ni il «Freier Rätier», lez stueva quintar cun ina reprimanda suarada giud scantschala. Baselgia, pressa e politica eran in'unitad inseparabla. S'entelli che talas tenu-tas francas, denton unilateralas ed intolerantas, han provocau reacziuns ch'ins enconuscha el Grischn sut la tezla dil «cumbat cultural». Quel ei staus supe-raus, silmeins sin sin basa instituziunala, pér cull'aboliziun dils artechels discriminants davart il scamond dils gesuits e dallas claustras igl onn 1973. Tut las emprovas da reformar la pressa catolica han denton fatg naufragi, igl ei la finala stau memia tard. Ton il «Pelegrin» sco la «Gasetta Romontscha» existan buca pli ed era tiel «Bündner Tagblatt» sentan ins oz strusch pli restonzas da sia missiun oriunda. Sco Tschuor constatescha cun raschun san gasettas e periodicas che miran cun ureglias-curom silla realità e se-sentan obligadas da preservar il pievel da prighels e spérts malmunds strusch pli exister en in mund secularisau e globalisau.

El gimnasi claustral a Mustér hagi la recepiun dalla giuvnas procurau 1972 per in veritabel scumbegil dil concept pedagogic tadiziunala. La societad purmein virila, l'idilla d'ina scola cul bul catolic che duveva preparar ils alums per la veta claustrala ni per l'elita dirigenta dalla tiara ei fruntada ei vegnida en turmeigl. Pretensius per concedisiun, per sclariment imparzial e nunpartischont, las tensiuns en connex cun l'atgna identitad, emozionalità e sexualità seigien fruntadas sin cunfins al gimnasi claustral en evoluziun. La magistraglia hagi reagiu sin quellas midadas cun cinissem ed elitarissem. In ver disput reflectau davart ils temas che barschavan da quei temps sin la pial hagi ei strusch dau, persuerter hagi la scola claustrala facilitau igl access al humanissem.

Reviulta e resvegl

Ina viulta radicala ella percepziun mediála dalla baselgia catolica hagi il Secund Concil Vatican la finala purtau. Il concil seigi staus in ver spitachel medial, di per di seigi vegniu rapportau davart quei eveniment dad «Aggiornamento», da regiuvinaziun e resvegl ella baselgia catolica. E quei cun gronda professiunalità, sco Tschuor constatescha posteriuramein. La tenuta dalla baselgia enviers ils mieds da massa seigi denton adina stada caracterisada da hist e host. Il clerus s'impatisava aunc adina culla tenuta tradiziunala dalla ghettoisaziun dil 19avel tschentaner, haveva negina fidanza e confidanza ella moderna e las novas acquisiziuns dalla tecnica eran suspectas. Aunc 1992 colportescha l'instrucziun dil pastoral il maletg che las medias manipuleschian, aschia che la communicaziun dalla baselgia seigi da concentrar sill'annunziaziun e sill'intermediaziun «dalla verdad». E quei malgrad che la Sinoda 72, la gronda reuniun dalla catolicas e dils catolics dalla Svizra, hagi dau impuls decisivs per ina nova orientaziun dalla communicaziun ecclesiastica. Igl onn 1999 ha la Conferenza dils uestgs svizzers publicau siu «plan pastoral per communicaziun e medias», ina posiziun inspirada digl ant. uestg auxiliari da Cuera Peter Henrici. Quei plan ha la finala menau 2008 alla declaronza dils uestgs svizzers davart la lavur da medias ed alla creaziun da treis centers da medias regionalas a Ligiaun, Losanna e Türitg.

Il drama egl uestgiu da Cuera

Il referent Tschuor ei buca senuspius da tematisar en sia allocuziun festiva las circumstanzas e consequenzas dil drama ch'ha priu sia entschatta cull'installaziun da *Wolfgang Haas* sco uestg da Cuera la primavera 1988. La communicaziun seigi stada caracterisada da panas e penibladads senza paregl. Ins hagi adina confirmau mo quei ch'era gia enconuscent ed applicau la tatica da salami cun cuschentiar, zuppentar e promovend aschia l'intransparenza. Hass seigi buca staus l'unfrenda dalla medias sco ei vegni magari pretendiu, mobein l'unfrenda d'in dilettantissem caschunau sez. Cun sia predilecziun per gloria e pompa seigi el davtaus ina figura preferida els tils da tscheiver ed igl uffeci episcopal seigi aschia davtaus penibels e ridiculs, manegia Tschuor. Las separaziuns e las scarpantas resultatontas caschunadas pervia dil cass Haas seigien aunc oz buca superadas. Il prighel che la baselgia e siu messadi cristian daventien adina dapli irrelevantes per las medias e per la societad seigi manifest. Il fatg che la baselgia seigi mo lu publicamein relevanta cu ella produceschi scandals seigi deplorabla, puntuescha Tschuor.

Concentrar e professionalisar la communicaziun

Malgrad la concentraziun dalla forzas detti ei oz aunc adina in tschuppel posts d'informaziun en fatgs ecclesiastics. Il referent menziun en quei connex cunzun la «Schweizerische Kirchenzeitung» per la Svizra tudestga, il magazin «Echo» per la Svizra romanda, e la gasetta uestgila «Giornale del Popolo» el Tessin e puntuescha en quei connex era expressivamein che La Quotidiana detti bia spazi alla tractaziun da tematics ecclesiasticas, teologicas e religiusas. Dasperas detti ei differents fepls parochials e magazins da claustras e convents e naturalmein era radio e television cun lur emisiuns religiusas ed auter pli. Ina muncanza deplorabla seigi ch'il consumt normal sappi strusch pli eruir danunder che l'informaziun deriva e con gesta ch'ella ei facticamein. Gest per la baselgia svizra cun siu sistem dual seigi la communicaziun ina gronda sfida. Ils catolics seigien numdadiu «ina muntanera selvadia», schegie buca diltut senza pastur, buca senza messadi ed evangeli. Savens maunchi denton in messadi superiur che colligi e seigi ligionts. Mo memia savens vegnien cunzun particularissem hierarchics, structurals e tematics tgrai e defunde, enstagi da puntuar quei ch'ei cumineivel e colligia. Ei fussi pli cunvegnent sch'ei dessi per mintga regiun linguistica mo in sulet post da tetg che risguardass denton la varietad ecclesiastica. Premissa seigi ch'ils uestgs da Cuera, S. Gagl, Basilea, Fribourg, Sitten e Lugano ed ils avats da Nossadunnaun e St. Maurice s'accordien ussa sin ina lingua. En in process da lavur intensiv hagi la cumissiun da medias dils uestgs svizzers sviluppu per quei intent ideas per ina communicaziun fritgeivla. Decisiva seigi ina posiziun coherent che seigi credibla e plausibla e che sesurveschi d'in lungatg e d'ina simbolica attractiva, progressiva ed empatica. La communicaziun stoppi risguardar commensuradamein la varietad dalla tendenzas culturals e spiritualas. Ei drovi plinavon era professiunalità e personalitads che seigien hablas da formular la communicaziun aschia ch'ella seigi credibla e che la baselgia vegni resentida sco forza che s'engaschi per la cardientscha cristiana, per la dignitad humana e per pasch e giustia. Il project «Renovaziun dalla baselgia» instradaus dacuort dils uestgs svizzers seigi per tuts involvi ina gronda ed impurtanta sfida, puntuescha Tschuor per conclusiun da siu referat tenius all'ocasiun dil Dies academicus dalla Scola aulta da teologia a Cuera.